

AD TIMOTHEUM I

Capitulum: 1 2 3 4 5 6

CAPITULUM 1

Paulus apostolus Christi Iesu secundum imperium Dei salvatoris nostri et Christi Iesu spei nostrae

² Timotheo dilecto filio in fide gratia misericordia pax a Deo Patre et Christo Iesu Domino nostro

³ sicut rogavi te ut remaneres Ephesi cum irem in Macedoniam ut denuntiares quibusdam ne aliter docerent

⁴ neque intenderent fabulis et genealogiis interminatis quae quaestiones praestant magis quam aedificationem Dei quae est in fide

⁵ finis autem praecepti est caritas de corde puro et conscientia bona et fide non ficta

⁶ a quibus quidam aberrantes conversi sunt in vaniloquium

⁷ volentes esse legis doctores non intellegentes neque quae loquuntur neque de quibus adfirmant

⁸ scimus autem quia bona est lex si quis ea legitime utatur

⁹ sciens hoc quia iusto lex non est posita sed iniustis et non subditis impiis et peccatoribus sceleratis et contaminatis patricidis et matricidis homicidis

¹⁰ fornicariis masculorum concubitoribus plagiariis mendacibus periuris et si quid aliud sanae doctrinae adversatur

¹¹ quae est secundum evangelium gloriae beati Dei quod creditum est mihi

¹² gratias ago ei qui me confortavit Christo Iesu Domino nostro quia fidelem me existimavit ponens in ministerio

¹³ qui prius fui blasphemus et persecutor et contumeliosus sed misericordiam consecutus sum quia ignorans feci in incredulitate

¹⁴ superabundavit autem gratia Domini nostri cum fide et dilectione quae est in Christo Iesu

¹⁵ fidelis sermo et omni acceptione dignus quia Christus Iesus venit in mundum peccatores salvos facere quorum primus ego sum

¹⁶ sed ideo misericordiam consecutus sum ut in me primo ostenderet Christus Iesus omnem patientiam ad deformationem eorum qui credituri sunt illi in vitam aeternam

¹⁷ regi autem saeculorum immortalis invisibili soli Deo honor et gloria in saecula saeculorum amen

¹⁸ hoc praeceptum commendo tibi fili Timothee secundum praecedentes in te prophetias ut milites in illis bonam militiam

¹⁹ habens fidem et bonam conscientiam quam quidam repellentes circa fidem naufragaverunt

²⁰ ex quibus est Hymeneus et Alexander quos tradidi Satanae ut discant non blasphemare

CAPITULUM 2

Obsecro igitur primo omnium fieri obsecrationes orationes postulationes gratiarum actiones pro omnibus hominibus

² pro regibus et omnibus qui in sublimitate sunt ut quietam et tranquillam vitam agamus in omni pietate et castitate

³ hoc enim bonum est et acceptum coram salutari nostro Deo

⁴ qui omnes homines vult salvos fieri et ad agnitionem veritatis venire

⁵ unus enim Deus unus et mediator Dei et hominum homo Christus Iesus

⁶ qui dedit redemptionem semet ipsum pro omnibus testimonium temporibus suis

⁷ in quo positus sum ego praedicator et apostolus veritatem dico non mentior doctor gentium in fide et veritate

⁸ volo ergo viros orare in omni loco levantes puras manus sine ira et disceptatione

⁹ similiter et mulieres in habitu ornato cum verecundia et sobrietate ornantes se non in tortis crinibus aut auro aut margaritis vel veste pretiosa

¹⁰ sed quod decet mulieres promittentes pietatem per opera bona

¹¹ mulier in silentio discat cum omni subiectione

¹² docere autem mulieri non permitto neque dominari in virum sed esse in silentio

¹³ Adam enim primus formatus est deinde Eva

¹⁴ et Adam non est seductus mulier autem seducta in praevaricatione fuit

¹⁵ salvabitur autem per filiorum generationem si permanserint in fide et dilectione et sanctificatione cum sobrietate

CAPITULUM 3

fidelis sermo si quis episcopatum desiderat bonum opus desiderat

² oportet ergo episcopum inreprehensibilem esse unius uxoris virum sobrium prudentem ornatum hospitem doctorem

³ non vinolentum non percussorem sed modestum non litigiosum non cupidum

⁴ suae domui bene praepositum filios habentem subditos cum omni castitate

⁵ si quis autem domui suae praeesse nescit quomodo ecclesiae Dei diligentiam habebit

⁶ non neophytum ne in superbia elatus in iudicium incidat diaboli

⁷ oportet autem illum et testimonium habere bonum ab his qui foris sunt ut non in obprobrium incidat et laqueum diaboli

⁸ diaconos similiter pudicos non bilingues non multo vino deditos non turpe lucrum sectantes

⁹ habentes mysterium fidei in conscientia pura

¹⁰ et hii autem probentur primum et sic ministrent nullum crimen habentes

¹¹ mulieres similiter pudicas non detrahentes sobrias fideles in omnibus

¹² diacones sint unius uxoris viri qui filiis suis bene praesunt et suis domibus

- ¹³ qui enim bene ministraverint gradum sibi bonum adquirent et multam fiduciam in fide quae est in Christo Iesu
- ¹⁴ haec tibi scribo sperans venire ad te cito
- ¹⁵ si autem tardavero ut scias quomodo oporteat te in domo Dei conversari quae est ecclesia Dei vivi columna et firmamentum veritatis
- ¹⁶ et manifeste magnum est pietatis sacramentum quod manifestatum est in carne iustificatum est in spiritu apparuit angelis praedicatum est gentibus creditum est in mundo adsumptum est in gloria

CAPITULUM 4

- S**piritus autem manifeste dicit quia in novissimis temporibus discedent quidam a fide adtendentes spiritibus erroris et doctrinis daemoniorum
- ² in hypocrisi loquentium mendacium et cauteriatam habentium suam conscientiam
- ³ prohibentium nubere abstinere a cibis quos Deus creavit ad percipiendum cum gratiarum actione fidelibus et his qui cognoverunt veritatem
- ⁴ quia omnis creatura Dei bona et nihil reiciendum quod cum gratiarum actione percipitur
- ⁵ sanctificatur enim per verbum Dei et orationem
- ⁶ haec proponens fratribus bonus eris minister Christi Iesu enutritus verbis fidei et bonae doctrinae quam adsecutus es
- ⁷ ineptas autem et aniles fabulas devita exerce te ipsum ad pietatem
- ⁸ nam corporalis exercitatio ad modicum utilis est pietas autem ad omnia utilis est promissionem habens vitae quae nunc est et futurae
- ⁹ fidelis sermo et omni acceptione dignus
- ¹⁰ in hoc enim laboramus et maledicimur quia speravimus in Deum vivum qui est salvator omnium hominum maxime fidelium
- ¹¹ praecipe haec et doce
- ¹² nemo adolescentiam tuam contemnat sed exemplum esto fidelium in verbo in conversatione in caritate in fide in castitate
- ¹³ dum venio adtende lectioni exhortationi doctrinae
- ¹⁴ noli neglegere gratiam quae in te est quae data est tibi per prophetiam cum inpositione manuum presbyterii
- ¹⁵ haec meditare in his esto ut profectus tuus manifestus sit omnibus
- ¹⁶ adtende tibi et doctrinae insta in illis hoc enim faciens et te ipsum salvum facies et qui te audiunt

CAPITULUM 5

- S**eniores ne increpaveris sed obsecra ut patrem iuvenes ut fratres
- ² anus ut matres iuvenulas ut sorores in omni castitate
- ³ viduas honora quae vere viduae sunt
- ⁴ si qua autem vidua filios aut nepotes habet discant primum domum suam regere et mutuam vicem reddere parentibus hoc enim acceptum est coram Deo
- ⁵ quae autem vere vidua est et desolata speravit in Deum et instat obsecrationibus et orationibus nocte ac die

- ⁶ nam quae in deliciis est vivens mortua est
- ⁷ et hoc praecipe ut inreprehensibiles sint
- ⁸ si quis autem suorum et maxime domesticorum curam non habet fidem negavit et est infideli deterior
- ⁹ vidua eligatur non minus sexaginta annorum quae fuerit unius viri uxor
- ¹⁰ in operibus bonis testimonium habens si filios educavit si hospitio recepit si sanctorum pedes lavit si tribulationem patientibus subministravit si omne opus bonum subsecuta est
- ¹¹ adolescentiores autem viduas devita cum enim luxuriatae fuerint in Christo nubere volunt
- ¹² habentes damnationem quia primam fidem irritam fecerunt
- ¹³ simul autem et otiosae discunt circumire domos non solum otiosae sed et verbosae et curiosae loquentes quae non oportet
- ¹⁴ volo ergo iuveniores nubere filios procreare matres familias esse nullam occasionem dare adversario maledicti gratia
- ¹⁵ iam enim quaedam conversae sunt retro Satanan
- ¹⁶ si qua fidelis habet viduas subministret illis et non gravetur ecclesia ut his quae vere viduae sunt sufficiat
- ¹⁷ qui bene praesunt presbyteri duplici honore digni habeantur maxime qui laborant in verbo et doctrina
- ¹⁸ dicit enim scriptura non infrenabis os bovi trituranti et dignus operarius mercede sua
- ¹⁹ adversus presbyterum accusationem noli recipere nisi sub duobus et tribus testibus
- ²⁰ peccantes coram omnibus argue ut et ceteri timorem habeant
- ²¹ testor coram Deo et Christo Iesu et electis angelis ut haec custodias sine praeiudicio nihil faciens in aliam partem declinando
- ²² manus cito nemini inposueris neque communicaveris peccatis alienis te ipsum castum custodi
- ²³ noli adhuc aquam bibere sed vino modico utere propter stomachum tuum et frequentes tuas infirmitates
- ²⁴ quorundam hominum peccata manifesta sunt praecedentia ad iudicium quosdam autem et subsequuntur
- ²⁵ similiter et facta bona manifesta sunt et quae aliter se habent abscondi non possunt

CAPITULUM 6

Quicumque sunt sub iugo servi dominos suos omni honore dignos arbitrentur ne nomen Domini et doctrina blasphemetur

- ² qui autem fideles habent dominos non contemnant quia fratres sunt sed magis serviant quia fideles sunt et dilecti qui beneficii participes sunt haec doce et exhortare
- ³ si quis aliter docet et non adquiescit sanis sermonibus Domini nostri Iesu Christi et ei quae secundum pietatem est doctrinae
- ⁴ superbus nihil sciens sed languens circa quaestiones et pugnas verborum ex quibus oriuntur invidiae contentiones blasphemiae suspensiones malae
- ⁵ conflictationes hominum mente corruptorum et qui veritate privati sunt existimantium quaestum esse pietatem
- ⁶ est autem quaestus magnus pietas cum sufficientia

- ⁷ nihil enim intulimus in mundum haut dubium quia nec auferre quid possumus
- ⁸ habentes autem alimenta et quibus tegamur his contenti sumus
- ⁹ nam qui volunt divites fieri incidunt in temptationem et laqueum et desideria multa inutilia et nociva quae mergunt homines in interitum et perditionem
- ¹⁰ radix enim omnium malorum est cupiditas quam quidam appetentes erraverunt a fide et inseruerunt se doloribus multis
- ¹¹ tu autem o homo Dei haec fuge sectare vero iustitiam pietatem fidem caritatem patientiam mansuetudinem
- ¹² certa bonum certamen fidei adprehende vitam aeternam in qua vocatus es et confessus bonam confessionem coram multis testibus
- ¹³ praecipio tibi coram Deo qui vivificat omnia et Christo Iesu qui testimonium reddidit sub Pontio Pilato bonam confessionem
- ¹⁴ ut serves mandatum sine macula inreprehensibile usque in adventum Domini nostri Iesu Christi
- ¹⁵ quem suis temporibus ostendet beatus et solus potens rex regum et Dominus dominantium
- ¹⁶ qui solus habet immortalitatem lucem habitans inaccessibilem quem vidit nullus hominum sed nec videre potest cui honor et imperium sempiternum amen
- ¹⁷ divitibus huius saeculi praecipe non sublime sapere neque sperare in incerto divitiarum sed in Deo qui praestat nobis omnia abunde ad fruendum
- ¹⁸ bene agere divites fieri in operibus bonis facile tribuere communicare
- ¹⁹ thesaurizare sibi fundamentum bonum in futurum ut adprehendant veram vitam
- ²⁰ o Timothee depositum custodi devitans profanas vocum novitates et oppositiones falsi nominis scientiae
- ²¹ quam quidam promittentes circa fidem exciderunt gratia tecum

For other languages please go to **www.wordproject.org**